

RADIO TELEVIZIJA FEDERACIJE
BOSNE I HERCEGOVINE

Broj: 4110-01/13
Datum: 14.07.2025 god.



RADIO AND TELEVISION
OF THE FEDERATION
OF BOSNIA AND HERZEGOVINA

PARLAMENT Federacije Bosne i Hercegovine

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Primljeno:	14-07-2025		
Org. jed.	Broj	Priloga	Vrijednost
01,02	-02-	1477	25

PREDSTAVNIČKI DOM
n/r Dragan Mioković - predsjedavajući
Ivan Miličević - sekretar

DOM NARODA
n/r Tomislav Martinović - predsjedavajući
Aida Hadžić- Salkić - v.d. sekretar

PREDMET: Dostava Statuta Radio-televizije Federacije Bosne i Hercegovine na potvrdu.

Poštovani,

Na 9. sjednici Upravnog odbora RTVFBiH održanoj dana 14.07.2025. godine, Upravni odbor RTVFBiH je donio (usvojio) Statut RTVFBiH.

Članom 10. Zakona o Javnom servisu radio-televizije Federacije Bosne i Hercegovine (Sl. Novine FBiH br. 48/08) propisano je da nakon donošenja, Statut potvrđuje Parlament Federacije, te vam isti dostavljamo na potvrdu.

U prilogu : Statut Radio-televizije Federacije Bosne i Hercegovine

S poštovanjem,

Upravni odbor RTVFBiH

Daniela Gogić, predsjedavajuća

RADIO TELEVIZIJA FEDERACIJE BOSNE I HERCEGOVINE, RADIO AND TELEVISION FEDERATION OF BOSNIA AND HERZEGOVINA, Bulevar Meše Selimovića 12, 71000 SARAJEVO **CENTRALA/MAIN SWITCHBOARD:** 455-211, 652-333, 461-101, **GENERALNI DIREKTOR/GENERAL DIRECTOR:** 464-070, 663-306, FAX: 464-071, E-mail: rtv1@rtvfbih.ba, **RADIO F BiH:** 455-102, **DESK:** fax: 455-141, **TV F BiH:** 461-522, **DESK:** fax: 461-537, **MARKETING:** 461-512, fax: 461-513, **MUZIČKA PRODUKCIJA/MUSIC PRODUCTION:** 455-117, **ZAJEDNIČKI POSLOVI/GENERAL SERVICE AND ADMINISTRATION:** 464-068, FAX: 464-067, **FINANSIJSKO-EKONOMSKI POSLOVI/FINANCIAL DEPARTMENT:** 455-126, fax: 461-127, **PRENOS I EMITOVANJE PROGRAMA/LINKS AND TRANSMITTERS:** 464-075, fax: 464-061

Na osnovu Zakona o Javnom radiotelevizijskom sistemu Bosne i Hercegovine ("Službeni glasnik BiH", broj 78/2005, 35/2009, 32/2010, 51/2015, 25/2016), člana 10. i člana 28. tačka a.) Zakona o Javnom servisu Radio-televizije Federacije Bosne i Hercegovine ("Službene novine FBiH", br. 48/08), Zakona o javnim preduzećima u Federaciji Bosne i Hercegovine ("Službene novine FBiH", br. 8/05, 81/08, 22/09, 109/12) i Zakona o privrednim društvima ("Službene novine FBiH", 81/15, 75/21), Upravni odbor Radio-televizije Federacije Bosne i Hercegovine je na 9. sjednici održanoj 14.07. 2025. godine, d o n i o:

STATUT RADIO-TELEVIZIJE FEDERACIJE BOSNE I HERCEGOVINE

I. OSNOVNE ODREDBE

Član 1.

Statutom Radio-televizije Federacije Bosne i Hercegovine (u daljem tekstu: Statut RTVFBiH) uređuju se: osnovne odredbe, statusna obilježja, principi emitiranja, poslovanje RTVFBiH, zaštita na radu i zaštita životne okoline, upravljanje i rukovođenje, postupak javne nabavke, zabranjene aktivnosti, opći akti, organiziranje uposlenika te prijelazne i završne odredbe.

Član 2.

Radio-televizija Federacije Bosne i Hercegovine (u daljem tekstu: RTVFBiH) osnovana je Zakonom o Javnom servisu Radio-televizije Federacije Bosne i Hercegovine ("Službene novine FBiH", br. 48/08) koji čini sastavni dio Odluke o restrukturiranju sistema javnog emitiranja u BiH - Aneks II ("Službene novine FBiH", br. 37/99).

Osnivač RTVFBiH je Parlament Federacije Bosne i Hercegovine s osnivačkim kapitalom u iznosu od 100.000,00 KM.

Osnivačka prava prema RTVFBiH vrši Parlament Federacije Bosne i Hercegovine.

Prava i obaveze po osnovu osnivačkih prava prema RTVFBiH vrše organi Federacije Bosne i Hercegovine kao prema privrednom subjektu koji obavlja djelatnost od javnog i društvenog interesa.

Član 3.

RTVFBiH je javno preduzeće osnovano kao javni radiotelevizijski servis za proizvodnju, prijenos i emitiranje programa radi ostvarivanja prava građana Federacije Bosne i Hercegovine na informiranje, kao i zadovoljavanja njihovih kulturnih, obrazovnih i drugih potreba.

RTVFBiH svoju djelatnost vrši u interesu javnosti i odgovara javnosti.

Član 4.

RTVFBiH je pravni subjekt upisan u Registar pravnih subjekata Kantonalnog suda u Sarajevu, pod matičnim registarskim brojem: 2 - 34, Rješenjem broj: UF/I - 4141/00 od 20. 6. 2000. godine i Rješenjem Općinskog suda u Sarajevu broj: 065 - 0 - Reg - 08 - 003814 od 23. 3. 2009. godine.

Organizacija i način rada RTVFBiH uređeni su Zakonom o Javnom servisu Radio-televizije FBiH ("Službene novine FBiH", br. 48/08), ovim statutom i drugim općim aktima RTVFBiH donesenim na osnovu Zakona i Statuta RTVFBiH.

Član 5.

RTVFBiH je dio Javnog radiotelevizijskog sistema Bosne i Hercegovine, a njen položaj u okviru toga sistema, kao i odnosi tri javna RTV servisa i zajedničkog pravnog subjekta unutar toga sistema - Korporacije, uređeni su Zakonom o Javnom radiotelevizijskom sistemu Bosne i Hercegovine ("Službeni glasnik BiH", br. 78/05), te Zakonom o Javnom servisu Radio-televizije Federacije Bosne i Hercegovine ("Službene novine FBiH", br. 48/08).

Član 6.

RTVFBiH kao dio Javnog radiotelevizijskog sistema Bosne i Hercegovine ostvaruje saradnju s javnim RTV servisima: Radiotelevizijom Bosne i Hercegovine (BHRT) i Radio Televizijom Republike Srpske (RTRS) da bi osigurala proizvodnju programa najvišeg kvaliteta i učinila ga dostupnim javnosti Bosne i Hercegovine, plasirajući istinite, raznovrsne i vjerodostojne informacije o političkim, privrednim, socijalnim, zdravstvenim, kulturnim, obrazovnim, naučnim, vjerskim, ekološkim, sportskim i drugim događajima.

II. STATUSNA OBILJEŽJA

1. Firma, znak i pečat RTVFBiH

Član 7.

Naziv javnog preduzeća je Radio-televizija Federacije Bosne i Hercegovine.

Skraćeni naziv javnog preduzeća je RTVFBiH.

Naziv javnog preduzeća RTVFBiH mora biti istaknut na zgradi u kojoj se nalaze prostorije sjedišta, napisan na službenim jezicima u Bosni i Hercegovini, latinicom i ćirilicom.

Član 8.

RTVFBiH ima svoj znak.

Znak je standardiziranog oblika i simbolizira RTVFBiH.

Organizacijske cjeline unutar RTVFBiH mogu imati svoj prepoznatljiv znak (logo) koji koriste prilikom audio-vizuelne prezentacije svojih programa.

Član 9.

Odluku o obliku, sadržaju i načinu upotrebe znaka donosi Upravni odbor RTVFBiH na prijedlog Poslovnog odbora RTVFBiH.

RTVFBiH je nosilac svih prava u pogledu upravljanja imenom i znakom RTVFBiH te s tim u vezi i ostvarivanja funkcije zaštite imena, znaka i ugleda RTVFBiH.

Član 10.

RTVFBiH ima svoj pečat.

Pečat je okruglog oblika, prečnika 35 mm, i sadrži puni naziv i sjedište RTVFBiH, ispisan latinicom i ćirilicom, a u sredini znak RTVFBiH.

RTVFBiH ima mali pečat, prečnika 18 mm, istog oblika i sadržaja kao i veliki pečat.

Broj pečata, način njihovog korištenja, čuvanja i uništenja, utvrđuje se odlukom generalnog direktora RTVFBiH.

Pečat RTVFBiH u pravnom prometu koristi se uz potpis ovlaštene osobe.

2. Poslovna korespondencija

Član 11.

Sva poslovna korespondencija organizacijskih cjelina RTVFBiH mora sadržavati puni naziv firme i sjedište RTVFBiH.

3. Sjedište RTVFBiH

Član 12.

Sjedište RTVFBiH je u Sarajevu, Bulevar Meše Selimovića broj 12.

4. Djelatnost RTVFBiH

Član 13.

Djelatnosti RTVFBiH, utvrđene Zakonom o Javnom servisu RTVFBiH:

1. priprema, proizvodnja, prijenos i emitiranje vlastitih radio i televizijskih programa, multimedijalnih sadržaja i naručivanja istih,
2. izdavanje i raspodjela štampanog materijala u vezi sa sopstvenim programom ili u vezi s pitanjima o emitiranju općenito,
3. skladištenje i korištenje arhiva, tonskih i videozapisa,
4. organizacija kulturnih, muzičkih i drugih događaja,
5. istraživanje javnog mnijenja, marketinške usluge te usluge oglašavanja i
6. pružanje usluga teletexta i djelatnosti vezanih uz ostala polja tehnologije emitiranja.

Putem zajedničkog pravnog subjekta, Korporacije, RTVFBiH učestvuje u:

1. nabavci programa,
2. uvođenju i korištenju novih tehnologija u oblasti emitiranja,
3. razmjeni i učešću u zajedničkim tehničkim i tehnološkim projektima sa drugim javnim radiotelevizijskim agencijama i producentima programa i
4. druge aktivnosti u skladu sa Zakonom o Javnom servisu Radio-televizije Federacije Bosne i Hercegovine i Zakonom o Javnom radiotelevizijskom sistemu Bosne i Hercegovine.

RTVFBiH može pružati dodatne programske servise i interakcije bez obzira na metod dostave (npr. online) ili modalitete finansiranja (npr. Pay TV) te prijenos programa i digitalnih podataka (npr. MP3 ili pisani sadržaj u E formi), kao i sve buduće vidove prijenosa programa.

Član 14.

Osim djelatnosti iz člana 13. ovog statuta, RTVFBiH obavlja i sljedeće poslove:

- razmjena i učestvovanje u zajedničkim programima, programsko-tehničkim i tehnološkim projektima sa drugim emiterima u BiH i svijetu,
- marketing poslovi iz domena proizvodnje, promocije, plasmana i distribucije proizvoda Radija Federacije BiH, Federalne televizije, interneta (web-stranice RTVFBiH i dr.), teletexta i drugih vidova medija,
- istraživanja tržišta,
- ugovaranje, proizvodnja i emitiranje marketing oglasa,
- proizvodnja, snimanje, distribucija i prikazivanje filmova,
- pružanje tehničkih usluga i iznajmljivanje tehničkih kapaciteta kojima raspolaže RTVFBiH domaćim i stranim, fizičkim i pravnim subjektima u zemlji i inozemstvu,
- audio i videoarhiva, statističke obrade programa i novinske dokumentacije,
- proizvodnja i distribucija medija, DVD i CD, i
- obrada i prodaja licencnih programa vlastite produkcije i koprodukcije.

Član 15.

Obavljanje poslova iz djelokruga RTVFBiH van sjedišta RTVFBiH obavlja se u dopisništvima (ITC - informativno-tehnički centar), kao i putem dopisnika u zemlji i inozemstvu.

Član 16.

RTVFBiH je samostalna u obavljanju svoje djelatnosti.

Samostalnost RTVFBiH se prvenstveno ogleda u pravu RTVFBiH da u skladu sa Zakonom samostalno obavlja svoju djelatnost, odlučuje o sadržaju svojih programa i vremenu njihovog emitiranja ili prijenosa, uređuje unutrašnju organizaciju i način rada i drugo.

RTVFBiH proizvodi i uređuje programe u skladu s najvišim profesionalnim kriterijima uz poštivanje umjetničkih i stvaralačkih sloboda, nezavisno od stanovišta državnih organa, političkih stranaka i drugih interesnih grupa.

5. Zastupanje i predstavljanje

Član 17.

RTVFBiH zastupa i predstavlja generalni direktor RTVFBiH.

Generalni direktor RTVFBiH ima neograničena ovlaštenja u potpisivanju i zaključivanju ugovora, raspolaganju imovinom i vršenjem svih pravnih poslova i radnji kojima se

stvaraju finansijske obaveze RTVFBiH, a čija vrijednost ne prelazi iznos od 10.000,00 KM.

Za potpisivanje i zaključivanje ugovora, raspolaganje imovinom i vršenje svih pravnih poslova i radnji kojima se stvaraju finansijske obaveze RTVFBiH čija vrijednost prelazi iznos od 10.000,00 KM, osim potpisa generalnog direktora RTVFBiH, potreban je i supotpis dva člana Poslovnog odbora i to izvršnog direktora Sektora ekonomsko-finansijskih poslova i izvršnog direktora Sektora pravnih poslova.

Za zaključivanje ugovora i vršenje svih pravnih poslova i radnji u ime i za račun RTVFBiH, a čija vrijednost prelazi iznos od 100.000,00 KM, potrebna je i prethodna pismena saglasnost Upravnog odbora RTVFBiH.

6. Odgovornost u pravnom prometu

Član 18.

RTVFBiH ima svojstvo pravnog subjekta i samostalno istupa u pravnom prometu u svoje ime i za svoj račun te za svoje obaveze odgovara cjelokupnom svojom imovinom.

7. Organizacija RTVFBiH

Član 19.

Organizacijsku strukturu RTVFBiH čine:

- Direkcija RTVFBiH
- Sektor za programe RTVFBiH
- Sektor ekonomsko-finansijskih poslova RTVFBiH
- Sektor marketinga RTVFBiH
- Sektor pravnih poslova RTVFBiH
- Odjel interne revizije

Član 20.

RTVFBiH može za realizaciju određenih programskih i drugih projekata, osim organizacijskih cjelina definiranih Pravilnikom o unutrašnjoj organizacijskoj strukturi RTVFBiH, formirati i druge organizacijske cjeline sa ograničenim ili neograničenim trajanjem.

Odluku o formiranju organizacijskih cjelina iz stava 1. ovog člana, donosi Upravni odbor RTVFBiH na prijedlog generalnog direktora RTVFBiH.

Član 21.

Unutrašnja organizacija RTVFBiH, utvrđena članom 19. ovog statuta, detaljnije je regulirana Pravilnikom o unutrašnjoj organizacijskoj strukturi RTVFBiH.

III. PRINCIPI EMITIRANJA

Član 22.

RTVFBiH svoje programe emitira na jednoj radio i jednoj TV mreži na teritoriji Federacije BiH, a u skladu sa Zakonom o Javnom servisu Radio-televizije Federacije BiH i Zakonom o Javnom radiotelevizijskom sistemu BiH.

Naziv radijskog kanala je Federalni radio, televizijski kanal nosi naziv Federalna televizija (FTV) i internetski portal "www.federalna.ba".

RTVFBiH svoje programe čini dostupnim javnosti putem zemaljske radiodifuzne mreže, satelitske, kablovske i internet distribucije, teletexta, proizvodnjom i plasmanom video i audionosača zvuka i slike te drugim načinima medijskog predstavljanja do sada poznatih analognih i digitalnih te budućih tehnologija i servisa.

Programi na kanalima iz prethodnog stava su komplementarni i u funkciji su šire programske ponude javnosti, pri čemu su u upotrebi jezici konstitutivnih naroda i ostalih, u skladu s utvrđenom programskom shemom za sve kanale.

Član 23.

RTVFBiH podnosi pojedinačni zahtjev za produženje dozvole za emitiranje Regulatornoj agenciji za komunikacije (u daljem tekstu: RAK), koju RAK izdaje na period od 5 (pet) godina, a koja mora biti komplementarna sa ostalim dozvolama za emitiranje koje izdaje RAK i u skladu sa odredbama Zakona o Javnom radiotelevizijskom sistemu Bosne i Hercegovine.

Član 24.

Programi RTVFBiH se pripremaju na jezicima konstitutivnih naroda Bosne i Hercegovine.

RTVFBiH određene programske sadržaje emitira na jezicima manjina koje žive u Federaciji Bosne i Hercegovine, a isti mogu biti emitirani i na stranim jezicima.

Programskim shemama radija i televizije, utvrđuju se programski sadržaji iz prethodnog stava ovog člana.

Član 25.

RTVFBiH rezervirat će najmanje 40% vremena za emitiranje domaćih programa u svim žanrovima, osim vijesti i sportskog programa.

Najmanje 10% emitiranog programa, izuzev informativnih emisija, sportskog programa i marketing oglasa, RTVFBiH mora naručiti od nezavisnih producenata i/ili komercijalnih RTV stanica, putem javnog poziva koji provodi Programsko vijeće.

IV. POSLOVANJE RTVFBiH

1. Planiranje

Član 26.

Planiranje u RTVFBiH ostvaruje se planom razvoja iskazanim po organizacijskim cjelinama, godišnjim finansijskim i poslovnim planom koji priprema generalni direktor za sljedeću godinu i isti dostavlja na usvajanje Upravnom odboru RTVFBiH, najkasnije do 1. novembra tekuće godine.

Generalni direktor podnosi izvještaj o poslovanju za prethodnu godinu, o kojem Upravni odbor odlučuje najkasnije do 28. februara svake godine.

U svakoj finansijskoj godini RTVFBiH, Poslovodni odbor, generalni direktor i Upravni odbor RTVFBiH, moraju osigurati da ukupni rashodi budu pokriveni ukupnim prihodima.

Gubici u poslovanju se namiruju iz imovine RTVFBiH, iz ostvarene dobiti tekućeg poslovanja RTVFBiH, sredstvima osnivača i drugih izvora u skladu sa zakonskim propisima.

2. Javnost rada

Član 27.

O obavljanju svoje djelatnosti RTVFBiH izvještava pravne subjekte i građane:

- putem sredstava javnog informiranja,
- na drugi prikladan način koji osigurava transparentnost u izvještavanju javnosti i
- putem službene web-stranice.

O uvjetima, načinu rada i poslovanja, RTVFBiH uposlenike obavještava neposrednim izvještavanjem izvršnih direktora sektora, objavljivanjem općih akata i drugih odluka na oglasnoj ploči RTVFBiH, izvještavanjem na skupovima uposlenika i na drugi prikladan način prema odredbi generalnog direktora.

Član 28.

Podatke o obavljanju djelatnosti, poslovanju ili uvid u dokumentaciju RTVFBiH sredstvima javnog informiranja i drugim pravnim subjektima daje generalni direktor ili osoba koju generalni direktor za to ovlasti.

Službene izjave ili obavještenja o radu RTVFBiH daje predsjedavajući Upravnog odbora RTVFBiH ili član Upravnog odbora po ovlaštenju predsjedavajućeg Upravnog odbora, generalni direktor RTVFBiH te druga osoba koju generalni direktor RTVFBiH ovlasti.

Za javnost rada RTVFBiH odgovoran je generalni direktor RTVFBiH.

3. Informiranje uposlenika

Član 29.

Poslove informiranja uposlenika obavlja Sektor marketinga RTVFBiH. Za istinito, pravovremeno, potpuno i razumljivo informiranje uposlenika odgovoran je izvršni direktor tog sektora.

Kao oblici informiranja uposlenika koriste se neposredni sastanci, pismeni izvještaji, oglasna ploča i drugi načini informiranja.

4. Vanjska saradnja

Član 30.

Angažiranje vanjskih saradnika RTVFBiH (autori, izvođači i dr.) uređuje se na temelju Zakona o autorskom pravu i srodnim pravima u Bosni i Hercegovini, Zakona o radu FBiH, Zakona o obligacionim odnosima i drugim zakonima, Pravilnika o autorskim i izvođačkim pravima i naknadama RTVFBiH, Pravilnika o radu RTVFBiH i drugim zakonskim i podzakonskim aktima.

5. Revizija

Član 31.

Obavezna je godišnja revizija poslovanja RTVFBiH od nezavisnog revizorskog društva.

Osim revizije iz stava 1. ovog člana, obavezna je i revizija prihoda od naplate i raspodjele RTV takse prema važećim zakonskim propisima.

6. Poslovna godina

Član 32.

Poslovna godina RTVFBiH je kalendarska (počinje 1. januara, a završava 31. decembra) za koju se izrađuju poslovni planovi i utvrđuju završni obračuni u skladu sa Zakonom.

7. Finansije

Član 33.

Redovna djelatnost RTVFBiH primarno se finansira prihodima iz sljedećih izvora:

- radio i televizijska taksa (u daljem tekstu: RTV taksa),
- marketing (proizvodnja i/ili emitiranje reklama) i
- ostali prihodi.

Raspodjela prihoda prikupljenih od RTV takse vrši se u skladu sa odredbom člana 23. Zakona o Javnom radiotelevizijskom sistemu Bosne i Hercegovine, a u vezi sa članom 18. Zakona o Javnom servisu RTVFBiH.

Prihodi koje RTVFBiH ostvaruje od marketinga primarno se koriste za finansiranje vlastite djelatnosti.

RTVFBiH može ostvariti prihode iz vlastite djelatnosti, uključujući, ali ne ograničavajući se na proizvodnju programa na osnovu posebnih zahtjeva, komercijalizaciju autorskih i srodnih prava, proizvodnju i prodaju audio-vizuelnih djela, pružanje usluga teletexta i drugih servisa.

8. Imovina RTVFBiH

Član 34.

Imovinu RTVFBiH čine sredstva za rad pribavljena od osnivača RTVFBiH, stečena pružanjem usluga i prodajom proizvoda ili stečena iz drugih izvora.

Imovinu RTVFBiH čine nekretnine, stvari, prava i sredstva evidentirana u poslovnim knjigama RTVFBiH.

RTVFBiH, zajedno sa druge dvije članice JRTV sistema BiH, imovinu koja je u vezi s funkcijama Korporacije daje na upravljanje Korporaciji JRTV servisa BiH, a u skladu sa Zakonom.

9. Poslovna tajna

Član 35.

U interesu čuvanja, sigurnosti i uspješnog poslovanja RTVFBiH, određeni podaci o poslovanju i razvoju, kao i o odnosima u RTVFBiH predstavljaju poslovnu tajnu i mogu se saopćavati trećim osobama na način i po postupku propisanom Zakonom i općim aktima o poslovnoj tajni.

Poslovna tajna su isprave, podaci o radu i poslovanju RTVFBiH, elementi poslovnih ugovora te zapisi čije bi objavljivanje i komentiranje ili ustupanje na uvid neovlaštenim osobama moglo štetiti poslovnom i/ili programskom interesu ili ugledu RTVFBiH.

Isprave, podaci i zapisi koji se smatraju poslovnom tajnom moraju biti obilježeni kao poslovna tajna.

Poslovnu tajnu dužni su čuvati članovi Upravnog odbora RTVFBiH, Programskog vijeća, svi uposlenici i vanjski saradnici RTVFBiH, bez obzira na koji su način saznali o njoj.

Obaveza čuvanja poslovne tajne ne prestaje ni nakon prestanka radnog odnosa u RTVFBiH.

Član 36.

Podatke i isprave koji predstavljaju poslovnu tajnu drugim osobama mogu saopćavati:

- predsjedavajući Upravnog odbora RTVFBiH i članovi Upravnog odbora kada ih ovlasti predsjedavajući i
- generalni direktor RTVFBiH, odnosno osoba koju on ovlasti.

V. ZAŠTITA NA RADU I ZAŠTITA ŽIVOTNE OKOLINE

Član 37.

RTVFBiH ima pravo i dužnost da u okviru svoje djelatnosti organizira i provodi mjere sigurnosti, mjere zaštite na radu koje se odnose na zaštitu ljudi i imovine te protivpožarne zaštite, a u skladu sa zakonskim propisima, međunarodnim standardima, općim aktima i prirodom posla.

Član 38.

Mjere zaštite i programi unapređivanja zaštite životne okoline sastavni su dio plana razvoja RTVFBiH, a za njihovo provođenje odgovoran je generalni direktor.

Generalni direktor RTVFBiH, izvršni direktori sektora RTVFBiH i uposlenici imaju pravo i obavezu, u okviru poslova radnog mjesta, poduzimati mjere zaštite i unapređenja životne okoline.

O djelatnostima koje ugrožavaju životnu okolinu svaki je uposlenik obavezan upozoriti izvršne direktore i generalnog direktora RTVFBiH.

VI. UPRAVLJANJE I RUKOVOĐENJE

Član 39.

Organi RTVFBiH

Organi RTVFBiH su: a) Upravni odbor RTVFBiH
b) Poslovodni odbor

Upravni odbor RTVFBiH

Član 40.

Upravni odbor je najviši organ RTVFBiH koji zastupa i štiti interese javnosti u pogledu radio i televizijskog programa, vrši nadzor nad cjelokupnim poslovanjem, kao i nad korištenjem i raspolaganjem imovinom RTVFBiH.

Upravni odbor RTVFBiH ima 4 (četiri) člana i to po jednog iz reda konstitutivnih naroda Bosne i Hercegovine te jednog člana iz reda ostalih.

Članovi Upravnog odbora su samostalni u vršenju svoje funkcije i ne primaju upute od organa koji ih je imenovao.

Mandat članova Upravnog odbora RTVFBiH traje četiri godine i ne može biti obnovljen.

Član 41.

Upravni odbor RTVFBiH ima sljedeće nadležnosti:

- donosi Statut i druge opće akte;
- odlučuje o raspolaganju imovinom u skladu sa Zakonom i Statutom;
- odlučuje o ulaganjima za razvoj RTVFBiH u skladu Zakonom i Statutom;
- usvaja izvještaje o finansijskom poslovanju;
- odobrava godišnji budžet i finansijski plan;
- odobrava finansijska izdvajanja RTVFBiH na iznos viši od 100.000,00 KM;
- usvaja programske planove za radio i televiziju u skladu sa dozvolom Sistema;
- imenuje i razrješava generalnog direktora RTVFBiH te zaključuje ugovor o radu sa generalnim direktorom RTVFBiH;
- daje saglasnost na imenovanje nosilaca najviših programskih funkcija;
- odlučuje o nazivu i logu radija i televizije;
- prati i kontrolira zakonitost i uspješnost rada RTVFBiH;
- predstavlja Parlamentu Federacije i javnosti godišnje finansijske planove, planove programa i podnosi izvještaje o realizaciji tih planova;
- obavlja i druge poslove u skladu sa Zakonom i Statutom;
- osigurava uvjete iz dozvole Sistema;
- odgovara za nadzor i kontrolu provođenja programskih principa u skladu sa Zakonom;
- imenuje i razrješava rukovodioca Odjela interne revizije.

Član 42.

Najviše programske funkcije u RTVFBiH, za čije imenovanje je potrebna saglasnost Upravnog odbora RTVFBiH:

1. Izvršni direktor za programe RTVFBiH;
2. Urednik TV programa;

3. Urednik multimedija;
4. Urednik radijskog programa;

Član 43.

Upravni odbor RTVFBiH donosi odluke većinom glasova od ukupnog broja svih članova, osim u slučajevima kada je za donošenje odluke potreban konsenzus Upravnog odbora RTVFBiH, a to su:

imenovanje i razrješenje generalnog direktora RTVFBiH, usvajanje Statuta RTVFBiH, programskih planova radija i televizije, kao i za donošenje finansijskih planova i godišnjih budžeta.

Detaljnije odredbe o radu Upravnog odbora RTVFBiH utvrđuju se Poslovnikom o radu Upravnog odbora RTVFBiH.

Član 44.

Članovi Upravnog odbora RTVFBiH imaju obavezu najmanje 5 (pet) dana u mjesecu raditi u Upravnom odboru RTVFBiH i za svoj rad imaju pravo na naknadu u iznosu od tri minimalne plaće u Federaciji BiH, kao i naknadu za razumne putne i materijalne troškove u skladu s važećim aktima RTVFBiH.

Član 45.

Upravni odbor RTVFBiH može osnovati savjetodavne organe za razmatranje i savjetovanje o različitim aspektima djelatnosti RTVFBiH.

Programsko vijeće

Član 46.

Upravni odbor RTVFBiH osnovat će Programsko vijeće koje ima isključivo savjetodavnu ulogu.

Način izbora, broj i sastav, imenovanje i razrješenje članova, kao i djelokrug vrši se u skladu s odredbama Zakona o javnom servisu Radio-televizije Federacije Bosne i Hercegovine.

Upravni odbor RTVFBiH, na osnovu javnog konkursa, predlaže jedanaest (11) članova Programskog vijeća u kojem su zastupljeni predstavnici svih kantona, konstitutivnih naroda u Bosni i Hercegovini i ostalih.

Programsko vijeće, na prijedlog Upravnog odbora RTVFBiH, imenuje Parlament Federacije BiH.

Programsko vijeće čine predstavnici naučnih, obrazovnih, vjerskih, kulturnih, privrednih, umjetničkih i sportskih institucija, udruženja, predstavnika mladih i penzionera.

Mandat članova Programskog vijeća je četiri godine i ne može biti obnovljen.

Član 47.

Članovi Programskog vijeća obavezni su održati najmanje jednu sjednicu u tri mjeseca. Programsko vijeće može, prema potrebi, održati i vanredne sjednice.

Redovne sjednice Programskog vijeća saziva predsjedavajući Programskog vijeća, a vanredne sjednice može sazvati predsjedavajući Upravnog odbora RTVFBiH samoinicijativno ili na prijedlog generalnog direktora RTVFBiH ili izvršnog direktora za programe RTVFBiH.

Članovi imaju pravo na naknadu za rad u Programskom vijeću, kao i na naknadu troškova prijevoza u razumnom iznosu.

Visinu naknade za rad u Programskom vijeću za svaku održanu sjednicu određuje Upravni odbor RTVFBiH na prijedlog generalnog direktora RTVFBiH.

Član 48.

Programsko vijeće savjetodavnu ulogu ostvaruje naročito kod:

- donošenja programskih planova RTVFBiH,
- predstavljanju javnosti i Parlamentu Federacije BiH godišnjih programskih planova i izvještaja,
- primjene usvojenih programskih smjernica i principa RTVFBiH i
- imenovanja rukovodnih osoba RTVFBiH.

Također, Programsko vijeće će razmatrati pritužbe pristigle u vezi s programskim principima i planovima RTVFBiH, kao i učestvovanje u komisijama iz spomenute oblasti.

Član 49.

Način rada Programskog vijeća detaljnije je uređen Poslovníkom o radu koji, nakon imenovanja, donosi Programsko vijeće.

Generalni direktor RTVFBiH

Član 50.

Generalnog direktora RTVFBiH imenuje i razrješava Upravni odbor RTVFBiH. Mandat generalnog direktora traje pet godina. Pripadnik istog konstitutivnog naroda ne može biti imenovan za generalnog direktora RTVFBiH dva mandata uzastopno. Generalni direktor RTVFBiH za svoj rad odgovara Upravnom odboru RTVFBiH.

Član 51.

Generalni direktor RTVFBiH organizira i vodi poslovanje RTVFBiH, predstavlja i zastupa RTVFBiH te je odgovoran za zakonitost i uspješnost rada RTVFBiH.

Generalni direktor RTVFBiH:

- predlaže osnove poslovne i programske politike;
- predlaže programe rada, planove rada i razvoja te poduzima mjere za njihovo provođenje;
- predlaže unutrašnju organizaciju RTVFBiH;
- imenuje i razrješava izvršne direktore sektora RTVFBiH;
- izvršava i organizira provođenje odluka Upravnog odbora RTVFBiH;
- poduzima mjere u oblasti zaštite na radu, zaštite i unapređenja životne okoline u skladu sa Zakonom i općim aktima RTVFBiH;
- podnosi Upravnom odboru RTVFBiH izvještaje o poslovanju i godišnji obračun;
- odlučuje o pravima, obavezama i odgovornostima uposlenika u skladu sa Zakonom i općim aktima RTVFBiH;
- priprema i predlaže opće akte RTVFBiH u skladu sa Zakonom i Statutom;
- donosi odluku o formiranju manjih organizacijskih dijelova unutar većih organizacijskih cjelina u RTVFBiH, dok o formiranju sektora, kao većih organizacijskih cjelina, odlučuje isključivo Upravni odbor RTVFBiH;
- obavlja i druge poslove u skladu sa Zakonom, Statutom i drugim općim aktima RTVFBiH;
- ima prava da samostalno potpisuje sve pravne i finansijske akte kojima se RTVFBiH zadužuje u iznosu do 10.000,00 KM.

Član 52.

Za generalnog direktora RTVFBiH ne može biti imenovana osoba koja vrši izvršnu, zakonodavnu i sudsku vlast na bilo kojem nivou vlasti u BiH ili koja je vlasnik, odnosno suvlasnik preduzeća koje obavlja djelatnost radijskog i televizijskog emitiranja i ukoliko je njegova funkcija nespojiva sa Zakonom o sukobu interesa.

Za generalnog direktora RTVFBiH može biti imenovana osoba koja, osim općih uvjeta propisanih Zakonom o Javnom servisu RTVFBiH i Zakonom o radu, ispunjava i posebne uvjete koje, prilikom raspisivanja konkursa, odredi Upravni odbor RTVFBiH.

Član 53.

Generalnom direktoru RTVFBiH prestaje funkcija po sljedećim osnovama:

- istek mandata
- razrješenje s funkcije prije isteka mandata, u skladu sa Zakonom
- raskid ugovora o radu, u skladu sa Zakonom

Član 54.

Upravni odbor RTVFBiH obavezan je razriješiti generalnog direktora RTVFBiH prije isteka mandata u sljedećim slučajevima:

- ako sam zatraži razrješenje u skladu s ugovorom o radu
- ako nastanu takvi razlozi koji prema posebnim propisima ili propisima kojima se uređuju radni odnosi, dovode do prestanka ugovora o radu

Upravni odbor RTVFBiH može razriješiti generalnog direktora RTVFBiH ukoliko ocijeni da generalni direktor RTVFBiH ne vrši svoju funkciju u skladu sa Zakonom, dozvolom Sistema, dozvolom RTVFBiH, Statutom RTVFBiH, općim aktima i njegovim ugovorom o radu.

U slučaju razrješenja generalnog direktora RTVFBiH, Upravni odbor RTVFBiH je obavezan odmah imenovati vršioca dužnosti, a u roku od 60 dana imenovati novog generalnog direktora RTVFBiH.

Poslovodni odbor

Član 55.

Poslovodni odbor čine generalni direktor RTVFBiH i rukovodioci sektora RTVFBiH.

Generalni direktor imenuje Poslovodni odbor RTVFBiH, u skladu sa Zakonom o Javnom servisu Radio-televizije Federacije Bosne i Hercegovine ("Službene novine FBiH", br. 48/08).

Način rada Poslovnog odbora RTVFBiH utvrđuju se Poslovnikom o radu koji donosi generalni direktor RTVFBiH.

Odjel interne revizije

Član 56.

U skladu sa odredbama Zakona o javnim preduzećima („Službene novine FBiH", br. 08/05, 81/08, 22/09 i 109/12), RTVFBiH obavezna je formirati Odjel interne revizije.

Upravni odbor RTVFBiH, na osnovu raspisanog konkursa, vrši izbor rukovodilaca Odjela interne revizije te donosi odluku o njegovom imenovanju.

Ugovor o djelu sa rukovodiocem Odjela interne revizije, na osnovu prethodne pismene saglasnosti Upravnog odbora RTVFBiH, zaključuje generalni direktor RTVFBiH.

Član 57.

Rukovoditelj Odjela interne revizije dužan je i odgovoran da uspostavi Odjel interne revizije odgovarajućeg obima, potrebnog za adekvatno obavljanje dužnosti utvrđene Zakonom o javnim preduzećima u FBiH i Statutom RTVFBiH te ima isključivu odgovornost za izbor i rukovođenje osobama uposlenim u ovom odjelu.

Član 58.

Rukovodilac Odjela interne revizije:

- upravlja radom Odjela;
- priprema godišnji plan revizije na osnovu ocjene rizika i usvojenog strateškog plana;
- daje usmena i pismena mišljenja po zahtjevu Upravnog odbora RTVFBiH, a radi rješavanja poslovnih rizika, prevazilaženja poslovnih problema i poboljšanja kvaliteta, poslovnosti i efikasnosti poslovanja u okviru poslovne strategije i politike;
- podnosi periodične i godišnje izvještaje o radu Odjela interne revizije i dostavlja ih Upravnom odboru RTVFBiH;
- odobrava nacrt revizorskog izvještaja koji je izradio interni revizor i dostavlja konačan revizorski izvještaj Upravnom odboru RTVFBiH;
- prema potrebi, učestvuje u obavljanju revizija poslovanja RTVFBiH, odnosno u proceduri angažiranja nezavisnih revizora za potrebe obavljanja revizije poslovanja RTVFBiH;
- procjenjuje sisteme i metode unutrašnje kontrole;
- prati provođenje preporuka navedenih u izvještajima iz prethodno obavljenih revizija poslovanja RTVFBiH;
- sarađuje s Uredom za reviziju institucija u FBiH u razmjeni izvještaja, dokumentacije i mišljenja i
- odgovara za provođenje poslova i radnih zadataka iz djelokruga svoga opisa poslova te za kontrolu provedbe poslova i radnih zadataka uposlenika kojima rukovodi.

Član 59.

Odjel interne revizije odgovoran je da:

- podnosi godišnju studiju rizika i plan revizije Upravnom odboru RTVFBiH u kojima je sadržan detaljan prikaz rizičnih područja i revizija koje će biti izvršene,
- podnosi izvještaj o obavljenim revizijama i preporuke Upravnom odboru i
- obavlja svoje dužnosti u potpunom skladu sa međunarodnim revizijskim standardima.

Član 60.

Odjel interne revizije čine zaposlenici RTVFBiH.

Rukovodilac Odjela interne revizije ne može biti uposlenik RTVFBiH, ali će za usluge koje pruža RTVFBiH dobiti adekvatnu novčanu naknadu u skladu s općim aktima RTVFBiH.

Član 61.

Upravni odbor RTVFBiH donosi odluku o razrješenju rukovodioca Odjela interne revizije.

Razlozi za razrješenje rukovodioca Odjela interne revizije:

- istek ugovora
- vršenje dužnosti protivno zakonskim propisima i odredbama općih akata RTVFBiH
- učešće u sukobu interesa
- učešće u aktivnostima koje su zabranjene, kao i nepodnošenje zahtjeva za odgovarajuće odobrenje ograničenih aktivnosti u smislu Zakona o javnim preduzećima u FBiH
- svjesno ili nesvjesno davanje ovlaštenja za obavljanje ograničene aktivnosti, čija je posljedica materijalna šteta za RTVFBiH
- izvršenje krivičnog ili drugog protivpravnog djela koje za posljedicu ima nastanak materijalne štete za RTVFBiH

Član 62.

Generalni direktor RTVFBiH je dužan:

- osigurati adekvatne prostorije s ciljem da bude omogućena operativnost Odjela interne revizije i neometano obavljanje poslova u Odjelu i
- osigurati da, bez izuzetka, Odjel interne revizije ima potpun i cjelovit uvid u svu dokumentaciju i evidenciju RTVFBiH potrebnu za obavljanje poslova revizije.

Rukovodioci sektora, imenovanja i razrješenja

Član 63.

Dužnosti i prava članova Poslovnog odbora definirani su organizacijskom strukturom i Pravilnikom o sistematizaciji radnih mjesta RTVFBiH.

Generalni direktor RTVFBiH imenuje i razrješava izvršne direktore sektora RTVFBiH prema najvišim stručnim i profesionalnim kriterijima te višegodišnjem iskustvu iz oblasti za koju rukovodilac treba biti izabran.

Novinari

Član 64.

Novinari i drugi programski uposlenici koji uređuju programe dužni su se pridržavati Zakona, ovog statuta, Etičkog kodeksa i drugih akata RTVFBiH.

Političko uvjerenje i pripadnost političkoj stranci ne smiju utjecati na obavljanje profesionalnih zadataka.

VII. POSTUPAK JAVNE NABAVKE

Član 65.

Svi postupci javne nabavke u RTVFBiH provode se u skladu s odredbama Zakona o javnim nabavkama Bosne i Hercegovine („Službeni glasnik BiH”, 39/14, 59/22 i 50/24).

Odjel javnih nabavki RTVFBiH imenuje članove Komisije za javne nabavke te definira njihova ovlaštenja u skladu sa Zakonom o javnim nabavkama, Pravilnikom o javnim nabavkama roba, usluga i proizvoda RTVFBiH kao i drugim zakonskim i općim aktima RTVFBiH.

Komisija za javne nabavke provodi postupak te priprema izvještaj o postupku javne nabavke u skladu s važećim propisima o javnoj nabavci.

Član 66.

Upravni odbor RTVFBiH:

- na prijedlog Poslovnog odbora RTVFBiH i/ili voditelja Odjela interne revizije, usvaja Pravilnik o javnim nabavkama roba, usluga i radova RTVFBiH usaglašen s važećim propisima o javnoj nabavci,
- nadzire rad Poslovnog odbora (generalnog direktora RTVFBiH i izvršnih direktora) u pogledu primjene Pravilnika o javnim nabavkama roba, usluga i radova RTVFBiH i
- pregleda izvještaje o javnoj nabavci robe, usluga i radova te pregleda pripremu izvještaja o mogućoj prevari ili zloupotrebi nadležnih tijela RTVFBiH.

Član 67.

Ukoliko Upravni odbor RTVFBiH, na osnovu izvještaja o javnoj nabavci ili putem neke druge informacije, utvrdi da je došlo do kršenja važećih propisa o javnim nabavkama ili Pravilnika o javnim nabavkama roba, usluga i radova RTVFBiH, obavezan je od generalnog direktora RTVFBiH i odgovorne osobe ili osoba tražiti da utvrđene

nepravilnosti budu hitno otklonjene te da budu poduzete odgovarajuće mjere za sankcioniranje odgovorne osobe ili osoba.

VIII. ZABRANJENE AKTIVNOSTI RTVFBiH

Član 68.

RTVFBiH nije dopušteno:

- davanje kredita ili pozajmica uposlenicima ili trećim subjektima ili davanje garancija ili osiguranja za kredite,
- davanje putem donacija u suprotnosti sa odredbama važećih zakonskih propisa,
- isplata plaća uposlenicima protivno odredbama važećih zakona o penzijskom i zdravstvenom osiguranju,
- vršenje izmjena ili dopuna u bilo kojem već zaključenom ugovoru o javnoj nabavci, osim ako nisu izvršene u skladu s važećim zakonima o javnoj nabavci i
- druge zabranjene aktivnosti određene Zakonom o javnim preduzećima u Federaciji Bosne i Hercegovine.

IX. OPĆI AKTI

Član 69.

Upravni odbor RTVFBiH usvaja sljedeće opće akte nakon što ih pripreme nadležne službe RTVFBiH:

- Statut RTVFBiH
- Pravilnik o radu RTVFBiH
- Pravilnik o finansijskom poslovanju RTVFBiH
- Pravilnik o unutrašnjoj organizacijskoj strukturi RTVFBiH
- Pravilnik o sistematizaciji radnih mjesta RTVFBiH
- Pravilnik o plaćama i naknadama uposlenika RTVFBiH
- Pravilnik o javnim nabavkama roba, usluga i radova RTVFBiH
- Pravilnik o komunikacijama RTVFBiH
- Pravilnik o računovodstvenom evidentiranju, knjigovodstvu, računovodstvenim politikama i finansijskim izvještajima RTVFBiH
- Pravilnik o internim kontrolama i internim kontrolnim postupcima u RTVFBiH
- Pravilnik o arhiviranju proizvedenih i prikupljenih fonografskih i videografskih zapisa RTVFBiH
- Pravilnik o autorskim i izvođačkim pravima RTVFBiH
- Cjenovnik autorskih i izvođačkih honorara i naknada
- Etički kodeks RTVFBiH
- Drugi akti kada je to propisano Zakonom, odnosno kada je to potrebno zbog rada i poslovanja RTVFBiH

Opći akti kojima se uređuju materijalna prava uposlenika moraju biti u skladu sa Zakonom o radu FBiH ("Službene novine FBiH", 26/16, 89/18, 23/20, 49/21, 103/21, 44/22 i 39/24) i Općim kolektivnim ugovorom za teritorij Federacije BiH.

Opći akti stupaju na snagu osmi dan od dana njihove objave na oglasnoj ploči RTVFBiH, osim ako izričito nije određeno da akt stupa na snagu odmah nakon objave.

Usaglašene opće akte, na prijedlog generalnog direktora RTVFBiH, donosi Upravni odbor RTVFBiH.

Član 70.

Akti Regulatorne agencije za komunikacije (kodeksi, pravila, odluke, preporuke i slično) obavezni su i neposredno se primjenjuju u RTVFBiH ukoliko nisu u suprotnosti sa Zakonom o Javnom servisu RTVFBiH ili Zakonom o Javnom radiotelevizijskom sistemu BiH.

X. ORGANIZIRANJE UPOSLENIKA

Član 71.

Uposlenici RTVFBiH mogu se organizirati u Sindikat ili drugi oblik samoorganiziranja radi ostvarivanja i zaštite svojih prava i interesa, pod uvjetom i na način određen Zakonom.

RTVFBiH je obavezna osigurati uvjete za rad Sindikata i drugih oblika organiziranja uposlenika u skladu sa Zakonom i Općim kolektivnim ugovorom za teritorij Federacije BiH ("Službene novine FBiH", br. 48/16,62/16).

Član 72.

Kada je u pitanju ostvarivanje i zaštita prava uposlenika RTVFBiH, Sindikat može podnositi prijedloge i primjedbe generalnom direktoru RTVFBiH, u skladu sa Zakonom i Općim kolektivnim ugovorom za teritorij Federacije BiH.

Generalni direktor RTVFBiH je obavezan zauzeti stav o podnesenim prijedlozima i primjedbama i o tome obavijestiti Sindikat.

Član 73.

Generalni direktor RTVFBiH je obavezan, prije donošenja odluka i normativnih akata koji zadiru u ekonomsku i socijalnu sferu uposlenika, pribaviti saglasnost Sindikata - Vijeća uposlenika.

XI. PRIJELAZNE I ZAVRŠNE ODREDBE

1. Korporacija javnih RTV servisa Bosne i Hercegovine

Član 74.

RTVFBiH, u skladu sa Zakonom o Javnom radiotelevizijskom sistemu Bosne i Hercegovine, ostvaruje saradnju sa BHRT-om i RTRS-om putem Korporacije javnih RTV servisa BiH te s Korporacijom putem Odbora sistema, upravnih odbora RTV servisa, saradnjom generalnih direktora javnih RTV servisa i Korporacije, programskih struktura te emitterskih i zajedničkih radnih tijela.

Član 75.

Do uspostave Korporacije, međusobni odnosi javnih RTV servisa regulirani su na osnovu Protokola o međusobnoj saradnji i Cjenovnika međusobnih usluga broj: 4110-01/504.

2. Upravni odbor RTVFBiH

Član 76.

Članom 65. Zakona o Javnom servisu Radio-televizije Federacije Bosne i Hercegovine reguliran je izbor prvog sastava članova Upravnog odbora i njihovi mandati. Po isteku mandata prvoizabranih članova Upravnog odbora RTVFBiH, Parlament Federacije imenuje članove Upravnog odbora RTVFBiH na način reguliran članom 25. Zakona o Javnom servisu Radio-televizije Federacije Bosne i Hercegovine.

3. Prestanak RTVFBiH

Član 77.

Odluka o prestanku RTVFBiH može biti donesena samo u formi zakona. Zakonom o prestanku RTVFBiH određuje se postupak prestanka i način raspodjele imovine.

4. Primjena općih akata RTVFBiH koji su bili na snazi prije donošenja Zakona o Javnom servisu RTVFBiH

Član 78.

Opći akti RTVFBiH bit će usklađeni s ovim statutom i odredbama Zakona o Javnom servisu Radio-televizije Federacije Bosne i Hercegovine. Do usklađivanja postojećih akata ili donošenja novih u skladu sa Zakonom o Javnom servisu Radio-televizije Federacije Bosne i Hercegovine i ovim statutom, primjenjuju se odredbe postojećih akata RTVFBiH, ako nisu u suprotnosti sa Statutom i Zakonom.

Postupak donošenja Statuta RTVFBiH

Član 79.

Prijedlog Statuta RTVFBiH, nakon konsultacija s Poslovodnim odborom, generalni direktor RTVFBiH dostavlja na usvajanje Upravnom odboru RTVFBiH. Nakon usvajanja od Upravnog odbora RTVFBiH, Statut RTVFBiH bit će dostavljen na potvrdu Parlamentu Federacije Bosne i Hercegovine.

Izmjene i dopune Statuta RTVFBiH

Član 80.

Izmjene i dopune Statuta RTVFBiH moguće je vršiti isključivo u proceduri koja je predviđena za njegovo donošenje.

Član 81.



Na pitanja koja nisu regulirana odredbama ovog statuta, primjenjuju se odredbe Zakona o Javnom servisu RTVFBiH, Zakona o Javnom radiotelevizijskom sistemu BiH, Zakona o javnim preduzećima u FBiH, Zakona o privrednim društvima Bosne i Hercegovine, Zakona o javnim nabavkama BiH kao i drugi odgovarajući propisi, ukoliko nisu u suprotnosti sa Zakonom o Javnom servisu Radio-televizije Federacije Bosne i Hercegovine.

Stupanje na snagu i objava Statuta RTVFBiH

Član 82.

Statut RTVFBiH stupa na snagu osam dana od dana objavljivanja u "Službenim novinama Federacije Bosne i Hercegovine".

Statut RTVFBiH će, nakon potvrde u Parlamentu FBiH, biti objavljen na oglasnoj ploči RTVFBiH u prostorijama RTV doma, kao i na službenoj web-stranici RTVFBiH.

**UPRAVNI ODBOR RTVFBiH**

Daniela Gogić, predsjedavajuća

Broj:

Datum:

4110-01/12
14.07.2025 god.